

ALAHADY - PAKA – TAONA D 2025



NITSANGAN-KO VELONA TOKOA I JESOA

Ry Kristianina havana, an-kafaliana sy an-karavoana ary am-pitiavana no anolorana ny fiarahabana sy ny firarian-tsoa ho antsika olo araiky jiaby, ho antsika mianakavy, ho antsika eglizy kely, eglizy fiombonana, eglizy fototra, eglizy iraka, isika diosezy jiaby ary izay rehetra afaka mamaky izao hafatra sy fampianarana amin'izao andron'ny Paka izao. Nitsangan-ko velona tokoa ny Tompo Aleloia. Tamin'ny Alahadin' ny sampankazo isika no nanomboka ny dingana lehibe rehefa avy nanao ny ezaky ny karemy dia tsy inona fa ny fidirantsika ao

Jerosalema izany hoe i Jesoa mpiara-belona amintsika ka miaraka aminy isika miditra ao Jerosalema. Fantatsika anefa fa ireo izay nihoby an'i Jesoa nanao hoe HOZANA ihany koa no nilaza tamin'ny Zoma masina hoe FANTSIHO AMIN'NY HAZO FIJALIANA sy

nanenjika Azy ka namono Azy. I Jesoa ilay novonoina iny, Izy ilay tsy nanota, Izy ilay nanaiky ho mpanota mba hanavotra antsika mpanota rehetra. Maty tokoa i Jesoa fa noho ny asan'Andriamanitra sy maha-Andriamanitra Azy dia nitsangan-ko velona Izy. Nankalazaintsika izany omaly hariva, Sabotsy masina, ka antitranterina amin'izao andro voalohan'ny herinandro izay fitsanganan-ko velona sy fahariana vaovao izao.

Vakiteny I : Asa 10, 34a. 37-43

Tononkira : Sal. 117,

Vakiteny II : Kôl. 3, 1-4

Evanjely : Jo. 20, 1-9

Ry Kristianina havana, ireo vakiteny rehetra henontsika tamin'iny herinandro masina iny dia mamintina ny fiainantsika manontolo : isika izay matetika mirehareha raha mahomby ny fiainantsika, isika ihany koa izay tia manenjika noho ny tsy fahampian'ny finoana, noho ny fahalemena, noho ny tsy fanànantsika finiavana eo amin'ny fiainantsika dia resin'ny fakampanahy ka lavo amin'ny fahotana. Mpiara-belona amintsika anefa i Jesoa ka Izy tafatsanganako velona ankehitriny no mampitsangana antsika satria niara-maty amin'ny fahotana taminy isika. Izany no mahatonga antsika ry havana malala isany, isika olo araiky jiaby, na amin'ny toerana maro samihafa dia faly isika mifampiarahaba satria nandresy izay faran-tampon'ny faharatsiana dia ny fahafatesana, i Jesoa, ka raha miaraka Aminy isika dia mitsanganako velona miaraka Aminy koa.

Afaka misafidy ny evanjely araka ny fankalazana ataontsika sy ny tsindrim-peo tiantsika asongadina. Amin'ity taon-jobilin'ny fanavotana ity dia ny Evanjelin'I Md Joany no raisintsika.

Antitranterin'i Md Paoly ao amin'ny vakiteny faharoa ny hoe : *“Esory re ny lalivay ela, mba ho vongana vaovao ianareo”* izany hoe esory izay mampirefarefa antsika amin'ny tany ka mahatonga antsika ho vatana ka mitoetra amin'ny fasana dia tsy inona fa ireo fialonana, fitiavan-tena, avonavona izay mandoto ny fiainantsika, mandoto ny fiainam-pianakaviana, ny fiainan'ny fiaraha-monina, ny fiainan'ny Eglizy isan-tsokajiny.

Amin'izao Paka izao miara-nitsangana amin'i Kristy isika ary izany no maha-olona. Ny biby no mirefarefa dia mandady amin'ny tany fa isika kosa omban'ny fahasoavan'Andriamanitra ka afaka miarina. Izany no dikan'ny batemy izay nohavaozintsika tamin'ny Sabotsy masina ny toky. Mijoroà àry isika ! Aoka hiala amin'ny fiainana lo ka hijoro amin'ny fiainana vaovao satria fahariana vaovao no dikan'ny Paka.

Nilaozan'i Jesoa ny fasana misy vatana lo ka aoka ny fandreseny koa hanampy antsika handao ny fiainantsika lo amin'ny fitiavan-tena sy hetraketra ary herisetra isan-karazany. Anjarantsika àry amin'izao Paka izao ny hanatanteraka ny iraka ataon'i Jesoa tafantsanganako velona ; *“Mandehana any Galilea any aho no mahita anareo”*, maniraka antsika Izy mba hiditra amin'ny fiainantsika, ho an'ny Galilea tokoa isika hiala amin'ny fiainana taloha ka hihavao ary io fiainana io no iainantsika ny maha-kristianina antsika.

Ny miala amin'ny fiainana lo dia ny mampanjaka ny marina. Ny manimba ny fiainantsika dia ny tsy fisian'ny fahamarinana eto amin'ny tanindrazantsika. Koa na dia misy ny harena rehetra aza isika dia noho ny lainga sy ny tsy marina ary ny risoriso manjaka amin'ny fiainana andavanandro no mahatonga antsika ho mahantra. Eo anivon'ny sekoly fanabeazana dia ampianarina ny zanantsika ny hiala amin'ny risoriso manapotika ny fifandraisantsika, ilaina ny fampanjakana ny rariny sy ny hitsiny ao anatin'ny fifanajana. Anaovantsika ezaka koa ny fanajana ny tontolo iainana.

Fahariana vaovao ny Paka koa aoka isika hanana maso vaovao eo amin'ny fifandraisana amin'ny zava-boaary, amin'ny tontolo iainantsika. Aoka mba hivelomantsika koa ny tontolo iainantsika izay nankininan'Andriamanitra tamintsika tamin'ny fahariana an'izao tontolo izao.

Anatin'ny Paka isika izay fahariana vaovao ka aoka hikorakora sy hikorokoro ny tontolo iainantsika fa tsy hanapotika. Araka ny teny faneva ataontsika hoe : “izay mitevy ala mamono taranaka, izay mamboly hazo dia manome aina”.

Araka izany, manome aina ny Paka ka aoka tsy hanapotika ny ala intsony isika fa hamboly hazo, hanome aina, mba ho tontolo misy fanantenana tokoa ny tontolontsika.

Paka ny fiainantsika raha lavitra ny fanapotehana sy ny herisetra fa ho olona malemy fanahy, tsy hoe midika bonaika tsy miasa fa olona tompon'andraikitra miasa manome hery vaovao sy fanantenana vaovao eo amin'ny fiainantsika andavanandro.

Ny fitsanganan-ko velona dia tsy mamela antsika hipetraka araka ny voalaza ao amin'ny Evanjely hoe : *“Aza matahotra ianareo; fantatro fa mitady an'i Jesoa izay nofantsihana tamin'ny Hazofijaliana ianareo. Tsy ato Izy, fa efa nitsangana araka izay nolazainy mandehana haingana milaza amin'ny mpianany fa efa nitsangana avy any amin'ny maty Izy; ary indro hialoha anareo any Galilea izy, any no hahitanareo Azy; izany àry, fa efa nilazako ianareo izay”*. Irahina àry isika hanambara ny Vaovao mahafaly amin'ny fiainantsika manontolo. Izany no fampitrahofana ny finoana sy ny fiainana. Izany no vokatry ny Paka, manambara fa miara-belona amintsika i Jesoa. Koa aoka àry hiroso amin'ny lalindalina isika amin'ny fiainam-pinoana fa indrindra amin'izao Paka izao.

Izany tsy midika hoe lasa anjely jiaby isika na lavorary manomboka niany fa zary Mpivahinin'ny Fanantenana izany hoe vahiny isika amin'ity tany. Mandalo eto ka aoka hahay hanararaotra manomana ho avy tsaratsara kokoa entanin'ny fanantenana tsy manodoka, tsy mamitaka satria fanantenana avy amin'i Kristy nandresy ny ratsy rehetra ary ny faratampony amin'ny ratsy dia ny fahafatesana. Io fanantenan'ny mpandresy io no maniraka antsika amin'izao Paka, na dia eo aza ireo krizy maro lafy, hiady amin'ny ratsy izay manimba ny fiainantsika. Io fanantenana tsy mamitaka io no maniraka antsika hametraka fifandraisana vaovao eo anivon'ny fiaraha-monina misy antsika, fifandraisana vaovao feno fanjana ny tontolo iainana, fifandraisana vaovao eo anivon'ny tontolom-pinoana ka vonona mandray antanana isika miroso lalindalina kokoa amin'ny fikatrohana rehetra. Tsarovy fa araka ny averimberintsika anio ny ho avy fa tsy rahampitso. Anio no tanterahantsika ny maha Mpivahinin'ny fanantenana antsika.

Ry Jesoa Tomponay ô, hafaliana lehibe tokoa ho anay nofidinao ho anisan'ny Fianakaviam-benao sy zandrinao izao Paka izao satria nandresy ianao ka handresy miaraka Aminao izahay amin'izao fankalazana ny Paka izao, izany no mahatonga anay hiredona hatraiza hatraiza ny Aleloia, ka tsy am-bava fotsiny no hiredonanay azy fa asianay Aleloia ny fiainanay manontolo, asianay ny fitsanganan-ko velona sy fahariana vaovao.

Tsy ho vitanay samirery izany, fantatrao ny fahalemenay sy ny fiainanay, hitanao tamin'ireo Apostoly izany ka ampio izahay hijoro ho tena vavolombelonao eo amin'ny fiainanay andavanandro ka ny fahasoavanao anie hanenika anay. Amin'izay dia hanjaka eto aminay tokoa ny fiadanan'ny Paka izay lazainao aminay hoe : “ Homba anareo anie ny fiadanako”

Enga anie ho eo anivon'ny eglizy kely fianakaviana, eglizy fiombonana, eglizy fototra, eglizy iraka, eo anivon'ny diosezy sy ny firenena maminay ity ny fiadanana, hanjaka eto aminay tokoa ilay fampihavanana izay manjaka amin'izao Paka izao fa tsy ny fampihavanana heverin'izao tontolo izao. Enga anie ho eto aminay tokoa ny fahamarinana ka hanjaka ny rariny sy ny hitsiny dia hikatsaka mandrakariva ny soa iombonana izahay eto anivon'ny firenenay sy izao tontolo izao. Amen

Mompera Arseveka Mgr Benjamin Ramaroson